

金

史

八

金史二十七

司莊園錄事司

國史

經筵事

刑部

奉

物修

河渠

黃河

漕渠

盧溝河

漳河

漳河

黃河金始克宋兩河悉界劉豫豫亡河遂盡入金境數十年間或決或塞遷徙無定金人設官置屬以主其事沿河上下九二十五埽六在河南十九在河北埽設散巡河官一負雄武滎澤原武陽武延津五埽則兼汴河事設黃汴都巡河官一負於河陰以莅之懷州孟津孟州及城北之四埽則兼沁水事設黃沁都巡河官一負於懷州以臨之

崇福上下衛南淇上四埽屬衛南都巡河官則居新鄉武城白馬書城教城四埽屬濬滑都巡河官則處教城曹甸都巡河官則總東明西佳孟華浚城四埽曹濟都巡河官則司定陶濟北寒山金山四埽者也故都巡河官凡六員後又特設崇福上下埽都巡河官兼石橋使凡巡河官皆從都水監廉舉總統埽兵萬二千人歲用薪百一十一萬三千餘束草百八十三萬七百餘束椿杙之木不與此備河之恒制也大定八年六月河決李固渡水潰曹州城分流于單州之境九年正月朝廷遣都水監梁肅往視之河南統軍使宗室宗叙言大河所以決溢者以河道積淤不

能受水故也今曹單雖被其患而兩州本以水利爲生所
害農田無幾今欲河復故道不惟大費工役又卒難成功
縱能塞之他日霖潦亦將潰決則山東河患又非曹單比
也又沿河數州之地驟興大役人心動搖恐宋人乘間構
爲邊患而肅亦言新河水六分舊河水四分今若塞新河
則二水復合爲一如遇漲溢南決則害於南京北決則山
東河北皆被其害不若李固南築隄以防決溢爲便尚書
省以聞上從之三月拜宗叙爲參知政事上諭之曰卿昨
爲河南統軍時嘗言黃河隄埽利害甚合朕意朕每念百
姓凡有差調吏互爲姦若不早計而迫期徵歛則民增十

倍之費然其所徵之物或委積經年至腐朽不可復用使
吾民數十萬之財皆爲棄物此害非細卿既叅朝政凡類
此者皆當革其弊擇所利而行之十一年河決王村南京
孟衛州界多被其害十二年正月尚書省奏檢視官言水
東南行其勢甚大可自河陰廣武山循河而東至原武陽
武東明等縣孟衛等州增築隄岸日役夫萬一千期以六
十日畢詔遣太府少監張九思同知南京留守事紇石烈
遜小字阿補孫監護工作十三年三月以尚書省請修孟津築
澤崇福埽堤以備水患上乃命雄武以下八埽並以類從
事十七年秋七月大雨河決白溝十二月尚書省奏修築

河隄日役夫一萬一千五百以六十日畢工詔以十八年
二月一日發六百里內軍夫并取職官人力之半餘聽發
民夫以尚書工部郎中張大節同知南京留守事高蘇董
役先是祥符縣陳橋鎮之東至陳留潘崗黃河堤道四十
餘里以縣官攝其事南京有司言乞專設埽官十九年九
月乃設京埽巡河官一員二十年河決衛州及延津京東
埽瀰漫至于歸德府檢視官南京副留守石抹輝者言河
水因今秋霖潦暴漲遂失故道勢益南行宰臣以聞乃自
衛州埽下接歸德府南北兩岸增築堤以捍湍怒計工一
百七十九萬六千餘日役夫二萬四千餘期以七十日畢

工遂于歸德府初設巡河官一員婦兵二百人且詔頻役夫之地與免今年稅賦二十一年十月以河移故道命築堤以備二十六年八月河決衛州堤壞其城上命戶部侍郎王寂都水少監王汝嘉馳傳措畫備禦而寂視被災之民不爲拯救乃專集衆以網魚取官物爲事民甚怨嫉上聞而惡之旣而河勢泛濫及大名上於是遣戶部尚書劉瑋往行戶部事從宜規畫默寂爲蔡州防禦使冬十月上謂宰臣曰朕聞亡宋河防一步置一人可添設河防軍數它日又曰比聞河水泛濫民罹其害者貲產皆空今復遣官於被災路分推排何耶右丞張汝霖曰今推排者皆非

被災之處上曰雖然必其鄰道也既鄰水而居豈無驚擾
遷避者乎計其貲產豈有餘哉尚何推排爲十一月又謂
宰臣曰河未決衛州時嘗有言者既決之後有司何故不
令朕知命詢其故二十七年春正月尚書省言鄭州河陰
縣聖后廟前代河水爲患屢禱有應嘗加封號廟額今因
禱祈河遂安流乞加褒贈上從其請特加號曰昭應順濟
聖后廟曰靈德善利之廟二月以衛州新鄉縣令張簾丞
唐括唐古出主簿溫敦偃喝以河水入城閉塞救護有功
皆遷賞有差御史臺言自來沿河京府州縣官坐視管內
河防缺壞特不介意若令沿河京府州縣長貳官皆於名

銜管勾河防事如任內規措有方能禦大患或守護不謹以致疎虞臨時聞奏以議賞罰上從之仍命每歲將泛之時令工部官一員沿河檢視於是以南京府及所屬延津封丘祥符開封陳留胙城杞縣長垣歸德府及所屬宋城寧陵虞城河南府及孟津河中府及河東懷州河內武陟同州朝邑衛州汲新鄉獲嘉徐州彭城蕭豐孟州河陽溫鄭州河陰滎澤原武汜水濬州衛陝州閿鄉湖城靈寶曹州濟陰滑州白馬睢州襄邑滕州沛單州單父解州平陸開州濮陽濟州嘉祥金鄉鄆城四府十六州之長貳皆提舉河防事四十四縣之令佐皆管勾河防事初衛州爲河

水所壞乃命增築蘇門遷其州治至二十八年水息居民
稍還皆不樂遷於是遣大理少卿康元弼按視之元弼還
奏舊州民復業者甚衆且南使驛道館舍所在向以不爲
水備以故被害若但修其堤之薄缺者可以無虞比之遷
治所省數倍不若從其民情修治舊城爲便乃不遷州仍
勅自今河防官司怠慢失備者皆重抵以罪二十九年五
月河溢于曹州小堤之北六月上諭旨有司曰比聞五月
二十八日河溢而所報文字如此稽滯水事最急切不可
緩稍緩時頃則難固護矣十二月工部言營築河堤用工
六百八萬餘就用埽兵軍夫外有四百三十餘萬工當用

民夫遂詔命去役所五百里州府差顧於不差夫之地均徵顧錢驗物力科之每工百五十文外日支官錢五十文米升半仍命彰化軍節度使內族裔都水少監大齡壽提控五百人往來彈壓先是河南路提刑司言沿河居民多困乏逃移蓋以河防差役煩重故也竊惟禦水患者不過堤埽若土功從實計料薪藁椿杙以時徵歛亦復何難今春築堤都水監初料取土甚近及其興工乃遠數倍人夫懼不及程貴價買土一隊之間多至千貫又許州初科薪藁十八萬餘束既而又配四萬四千是皆常歲必用之物農隙均科則易輸納自今堤埽興工乞令本監以實計度

量一歲所用物料驗數折稅或令和買於冬月分爲三限
輸納爲便詔尚書省詳議以聞明昌元年春正月尚書省
奏臣等以爲自今凡興工役先量負土遠近增築高卑定
功立限榜諭使人先知無令增加力役并河防所用物色
委都水監每歲於八月以前先拘籍舊貯物外實闕之數
及次年春工多寡移報轉運司計置於冬三月分限輸納
如水勢不常夏秋暴漲危急則用相鄰埽分防備之物不
足則復於所近州縣和買然復慮人戶道塗泥淖艱于運
納止依稅内科折他物更爲增價當官支付違者並論如
律仍令所屬提刑司正官一負馳驛監視體究如此則役

作有程而河不失備制可之四年十一月尚書省奏河平
軍節度使王汝嘉等言大河南岸舊有分流河口如可疏
導足泄其勢及長堤以北恐亦有可以歸納排淪之處乞
委官視之濟北埽以北宜創起月堤臣等以爲宜從所言
其本監官皆以諳練河防故注以是職當使從汝嘉等同
往相視庶免異議如大河南北必不能開挑歸納其月堤
宜依所料興修上從之十二月勅都水監官提控修築黃
河堤及令大名府差正千戶一員部甲軍二百人彈壓勾
當五年春正月尚書省奏都水監丞田櫟同本監官講議
黃河利害嘗以狀上言前代每遇古堤南決多經南北清

河分流南清河北下有枯河數道河水流其中者長至七八分北清河乃濟水故道可容三二分而已今河水趨北齧長堤而流者十餘處而堤外率多積水恐難依元料增修長堤與創築月堤也可於北岸墻村決河入梁山灤故道依舊作南北兩清河分流然北清河舊堤歲久不完當立年限增築大堤而梁山故道多有屯田軍戶亦宜遷徙今擬先於南岸王村宜村兩處決隄導水使長堤可以固護姑宜仍舊如不能疏導即依上開決分爲四道俟見水勢隨宜料理尚書省以櫟等所言與明昌二年劉璘等所奏視利害不同及令陳言人馮德興與櫟面對亦有不合

者送工部議復言若遷於墻村疏決緣瀕北清河州縣二十餘處兩岸連亘千有餘里其隄防素不修備恐所屯軍戶亦卒難徙今歲先於南岸延津縣堤決堤洩水其北岸長堤自白馬以下定陶以上並宜加功築護庶可以遏將來之患若定陶以東三埽棄堤則不必修止決舊壓河口引導積水東南行流堤北張彪白塔兩河間礙水軍戶可使遷徙及梁山濼故道分屯者亦當預爲安置宰臣奏曰若遽從櫟等所擬恐既更張利害非細比召河平軍節度使王汝嘉同計議先差幹濟官兩員行戶工部事覆視之同則就令計實用工物量州縣遠近以調丁夫其督趣春

工官即充今歲守漲及與本監官同議經久之利詔以知大名府事內族裔尚書戶部郎中李敬義充行戶工部事以叅知政事胥持國都提控又奏差德州防禦使李獻可尚書戶部郎中焦旭於山東當水所經州縣築護城堤及北清河兩岸舊有堤處別率丁夫修築亦就令講究河防之計他日上以宋閻士良所述黃河利害一帙付叅知政事馬琪曰此書所言亦有可用者今以賜卿二月上諭平章政事守貞曰王汝嘉田櫟專管河防此國家之重事也朕比問其曾於南岸行視否乃稱未也又問水決能行南岸乎又云不可知且水趨北久矣自去歲便當經畫今不

稱職如是耶可諭旨令往盡心固護無致失備及講究所以經久之計稍涉違慢當併治罪三月行省并行戶工部及都水監官各言河防利害事都水監元擬於南岸王村宜村兩處開導河勢緣北來水勢去宜村堤稍緩唯王村岸向上數里卧捲可以開決作一河且無所犯之城市村落又擬於北岸墻村䟽決依舊分作兩清河入梁山故道北清河兩岸素有小堤不完後當築大隄尚書省謂以黃河之水勢若於墻村決注則山東州縣膏腴之地及諸塩場必被淪溺設使修築壞堤而又吞納不盡功役至重虛困山東之民非徒無益而又害之也况長堤已加固護復

於南岸疏決水勢已寢決河入梁山灤之議水所經城邑
已勸率作護城堤矣先所修清河舊堤已遣罷之監丞田
櫟言定陶以東三埽棄堤不當修止言決舊壓河口以導
漸水入堤北張彪白塔兩河之間凡當水衝屯田戶須令
遷徙臣等所見止當堤前作木岸以備之其間居人未當
遷徙至夏秋水勢泛溢權令避之水落則當各復業此亦
戶工部之所言也上曰地之相去如此其遠彼中利害安
得悉知惟委行省盡心措畫可也四月以田櫟言河防事
上諭旨叅知政事持國曰此事不惟責卿要卿等同心規
畫不勞朕心爾如櫟所言築堤用二十萬工歲役五十日

五年可畢此後之大古所未有況其成否未可知就使可成恐難行也遷徙軍戶四千則不爲難然其水特決尚不知所歸儻有潰走若何枝梧如今南岸兩處䟽決使其水趨南或可分殺其勢然水之形勢朕不親見難爲條畫雖卿亦然丞相左丞皆不熟此可集百官詳議以行百官咸謂櫟所言棄長堤無起新堤放河入梁山故道使南北兩清河分流爲省費息民長久之計臣等以爲黃河水勢非常變易無定非人力可以斟酌可以指使也況梁山淤填已高而北清河窄狹不能吞伏兼所經州縣農民廬井非一使大河北入清河山東必被其害櫟又言乞許都水

監符下州府運司專其用度委其任責一切同於軍期仍
委執政提控緣今監官已經添設又於外監署司多以沿
河州府長官兼領之及令佐管勾河防其或怠慢已有同
軍期斷罪的決之法凡櫟所言無可用遂寢其議八月以
河決陽武故堤灌封丘而東尚書省奏都水監行部官有
失固護詔命同知都轉運使高旭武衛軍副都指揮使女
奚列奕小字韓家奴同往規措尚書省奏都水監官前來有犯
已經戒諭使之常切固護今王汝嘉等殊不加意既見水
勢趨南不預經畫承留守司累報輒爲遷延以至害民即
是故違制旨私罪當的決詔汝嘉等各削官兩階杖七十

罷職上謂宰臣曰李愈論河決事謂宜遣大臣往以慰人心其言良是嚮慮河北決措畫堤防猶嘗置行省況今方橫潰爲害而止差小官恐失衆望自國家觀之雖山東之地重於河南然民皆赤子何彼此之間乃命參知政事馬琪往仍許便宜從事上曰李愈不得爲無罪雖都水監官非提刑司統攝若與留守司以便宜率民固護或申聞省部亦何不可使朕聞之徒能張皇水勢而無經畫及其已決乃與王汝嘉一往視之而還亦未嘗有所施行問王村河口開導之月則對以四月終其實六月也月日尚不知提刑司官當如是乎尋命戶部員外郎何格賑濟被浸之

民時行省參知政事胥持國馬琪言已至光祿村周視堤口以其河水浸漫堤岸陷潰至十餘里外乃能取土而堤面窄狹僅可數步人力不可施雖窮力可以暫成終當復毀而中道淤澱地有高低流不得泄且水退新灘亦難開鑿其孟華等四埽與孟陽堤道沿汴河東岸但可施功者即悉力修護將於農隙興役及凍畢工則京城不至爲害參知政事馬琪言都水外監負數冗多每事相倚或復邀功議論紛紜不一隳廢官事擬罷都水監掾設勾當官二員又自昔選用都散巡河官止由監官辟舉皆諸司人或

有楚疾避倉庫之繁行賄請託以致多不稱職擬升都巡

河作從七品於應入縣令廉舉人內選注外散巡河依舊
亦於諸司及丞簿廉舉人內選注並取年六十以下有精
力能幹者到任一年委提刑司體察若不稱職即日罷之
如守禦有方致河水安流任滿從本監及提刑司保申量
與升除凡河橋司使副亦擬同此選注繼而胥持國亦以
爲言乃從其請閏十月平章政事守貞曰馬琪措畫河防
事未見功役之數加之積歲興功民力將困今葺國復病
請別遣有材幹者往議之上曰堤防救護若能成功則財
力固不敢惜第恐財殫力屈成而復毀如重困何宰臣對
曰如盡力固護縱爲害亦輕若恬然不顧則爲害滋甚上

曰無乃因是致盜賊乎守貞曰宋以河決興役亦嘗致盜賊然多生於凶歉今時平歲豐少有差役未必至此且河防之役理所當然今之當役者猶爲可耳至於科徵薪芻不問有無督輸迫切則破產業以易之恐民益困耳上曰役夫須近地差取若遠調之民益艱苦但使津濟可也然當俟馬琪至而後議之庚辰琪自行省還入見言孟陽河堤及汴堤已填築補修水不能犯汴城自今河勢趨北來歲春首擬於中道䟽決以解南北兩岸之危凡計工八百七十餘萬可於正月終興工臣乞前期再往河上監視上以所書付尚書省而治檢覆河堤并守漲官等罪有差他

日尚書省奏事上語及河防事馬琪奏言臣非敢不盡心然恐智力有所不及若別差官相度儻有奇畫亦未可知如適與臣策同方來興功亦庶幾稍寬朝廷憂顧上然之命翰林待制奧屯忠孝權尚書戶部侍郎太府少監溫昉權尚書工部侍郎行戶工部事修治河防且諭之曰汝二人皆朕所素識以故委任冀副朕意如有錯失亦不汝容承安元年七月勅自今沿河傍側州府縣官雖部除者皆勿令負關恭和二年九月勅御史臺官河防利害初不與卿等事然臺官無所不問應體究者亦體究之五年二月以崔守真言黃河危急芻蕘物料雖云折稅每年不下五

六次或名爲和買而未嘗還其直勅委右三部司正郭解御史中丞孟鑄講究以聞解等言大名府鄭州等處自承安二年以來所科芻藁未給價者計錢二十一萬九千餘貫遂命以各處見錢差能幹官同各州縣清強官一一酬之續令按察司體究宣宗貞祐三年壬申上遣參知政事侯摯祭河神於宜村三年四月單州刺史顏蓋天澤言守禦之道當決大河使北流德博觀滄之境今其故堤宛然猶在工役不勞水就下必無漂沒之患而難者若不以犯滄鹽場損國利爲說必以浸沒河北良田爲解臣嘗聞河側故老言水勢散漫則淺不可以馬涉深不可以舟濟此

守禦之大計也若曰浸民田則河徙之後淤爲沃壤正宜耕墾收倍于常利孰大焉若失此計則河南一路兵食不足而河北山東之民皆瓦解矣詔命議之四年三月延州刺史溫撒可喜言近世河離故道自衛東南而流由徐邳入海以此河南之地爲狹臣竊見新鄉縣西河水可決使東北其南有舊隄水不能溢行五十餘里與清河合則由濟州大名觀州清州柳口入海此河之故道也皆有舊隄補其缺罅足矣如此則山東大名等路皆在河南而河北諸郡亦得其半退足以爲禦備之計進足以壯恢復之基又言南岸居民旣已籍其河夫修築河堰營作戍屋又使

轉輸芻糧賦役繁殷倍於他所夏秋租稅猶所未論乞減其稍緩者以寬民力事下尚書省宰臣謂河流東南舊矣一旦決之恐故道不容衍溢而出分爲數河不復可收水分則淺狹易渡天寒輒凍禦備愈難此甚不可詔但令量宜減南岸郡縣居民之賦役五年夏四月勅樞密院沿河要害之地可壘石岸仍置撒星椿陷馬塹以備敵

漕渠金都於燕東去潞水五十里故爲牐以節高良河白蓮潭諸水以通山東河北之粟凡諸路瀕河之城則置倉以貯傍郡之稅若恩州之臨清歷亭景州之將陵東光清州之興濟會川獻州及深州之武強是六州諸縣皆置倉

之地也其通漕之水舊黃河行滑州大名恩州景州滄州會川之境漳水東北爲御河則通蘇門獲嘉新鄉衛州濬州黎陽衛縣彰德磁州洺州之饒衡水則經深州會于滹沱以來獻州清州之餉皆合于信安海壩汴流而至通州由通州入牐十餘日而後至于京師其它若霸州之巨馬河雄州之沙河山東之北清河皆其灌輸之路也然自通州而上地峻而水不留其勢易淺舟膠不行故常從事陸輓人頗艱之世宗之世言者請開廬溝金口以通漕運役衆數年竟無成功事見漕渠其後亦以牐河或通或塞而但以車輓矣其制春運以冰消行暑雨畢秋運以八月行

冰凝畢其綱將發也乃合衆以所載之粟苴而封之先以
付所卸之地視與所封樣同則受凡綱船以前期三日修
治日裝一綱裝畢以三日啓行計道里分泝流沿流爲限
至所受之倉以三日卸又三日給收付凡輓漕脚直水運
鹽每石百里四十八文米五十文一分二釐七毫粟四十
文一分三毫錢則每貫一文七分二釐八毫陸運傭直米
每石百里百一十二文一分五毫粟五十七文六分八釐
四毫錢每貫三文九釐六毫餘物每百斤行百里平路則
春冬百三十一文五分夏秋百五十七文八分山路則春
冬百四十九文夏秋二百一文凡使司院務納課傭直春

冬九十文三分夏秋百一十四文諸民戶射賃官船漕運者其脚直以十分爲率初年尅二分二年尅一分八釐三年尅一分七釐四年尅一分五釐五年以上尅一分初世宗大定四年八月以山東大熟詔移其粟以實京師十月上出近郊見運河湮塞召問其故主者云戶部不爲經畫所致上召戶部侍郎曹望之責曰有河不加濬使百姓陸運勞甚罪在汝等朕不欲即加罪宜悉力使漕渠通也五年正月尚書省奏可調夫數萬上曰方春不可勞民令宮籍監戶東宮親王人從及五百里內軍夫濬治二十一年以八月京城儲積不廣詔沿河恩獻等六州粟百萬餘石

運至通州輦入京師明昌三年四月尚書省奏遼東北京路米粟素饒宜航海以達山東昨以按視東京近海之地自大務清口并咸平銅善館皆可置倉貯粟以通漕運若山東河北荒歉即可運以相濟制可承安五年邊河倉州縣可令折納菽二十萬石漕以入京驗品級養馬於俸內帶支仍漕麥十萬石各支本色乃命都水監丞田標相視運糧河道泰和元年尚書省以景州漕運司所管六河倉歲稅不下六萬餘石其科州縣近者不下二百里官吏取賄延阻人不勝苦雖近官監之亦然遂命監察御史一員往來糾察之五年上至霸州以故漕河淺涘勅尚書省發

山東河北河東中都北京軍夫六千改鑿之犯屯田戶地者官對給之民田則多酬其價六年尚書省以凡漕河所經之地州縣官以爲無與於己多致淺滯使綱戶以盤淺剥載爲名姦弊百出於是遂定制凡漕河所經之地州府官街內皆帶提控漕河事縣官則帶管勾漕河事俾催檢綱運管護隄岸爲府三大興大名彰德州十二恩景滄清獻深衛濬滑磁洺通縣三十三大名元城館陶夏津武城歷亭臨清吳橋將陵東光南皮清池靖海興濟會川交河樂壽武強安陽湯陰臨漳成安滏陽內黃黎陽衛蘇門獲嘉新鄉汲潞武清香河郭陰十二月通濟河初設巡河官

一負與天津河同爲一司通管漕河牐岸止名天津河巡河官隸都水監八年六月通州刺史張行信言船自通州入牐凡十餘日方至京師而官支五日轉脚之費遂增給之貞祐三年旣遷于汴以陳穎二州瀕水欲借民船以漕不便遂依觀州漕運司設提舉官募船戶而籍之命戶部勾當官往來巡督四年從右丞侯摯言開沁水以便餽運上又念京師轉輸之勞命出尚廐牛及官車以助其力興定四年十月諭皇太子曰中京運糧護送官當擇其人萬有一失樞密官亦有罪矣其船當用毛花輦所造兩首尾者仍張幟如渡軍之狀勿令敵知爲糧也陝西行省把胡

魯言陝西歲運糧以助關東民力浸困若以舟自渭入河順流而下可以紓民力遂命嚴其偵候如有警則皆維於南岸時朝廷以邳徐宿泗軍儲京東縣輓運者歲十餘萬石民甚苦之元光元年遂於歸德府置通濟倉設都監一員以受東郡之粟定國節度使李復亨言河南駐蹕兵不可闕糧不厭多比年少有匱乏即仰給陝西陝西地腴歲豐十萬石之助不難但以車運之費先去其半民何以堪宜造大船二十由大慶關渡入河東抵湖城往還不過數日篙工不過百人使舟皆容三百五十斛則是百人以數日運七千斛矣自夏抵秋可漕三千餘萬斛且無稽滯之

惠上從之時又於靈璧縣潼郡鎮設倉都監及監支納以方開長直溝將由萬安湖舟運入汴至泗以貯粟也

盧溝河大定十年議決盧溝以通京師漕運上忻然曰如此則諸路之物可徑達京師利孰大焉命計之當役千里內民夫上命免被災之地以百官從人助役已而勅宰臣曰山東歲飢工役興則妨農作能無怨乎開河本欲利民而反取怨不可其姑罷之十一年十二月省臣奏復開之自金口䟽導至京城北入壕而東至通州之北入潞水計工可八十日十二年三月上令人覆按還奏止可五十日上召宰臣責曰所餘三十日徒妨農費工卿等何爲慮不

及此及渠成以地勢高峻水性渾濁峻則奔流漩洄齧岸
善崩濁則泥淖淤塞積滓成淺不能勝舟其後上謂宰臣
曰分盧溝爲漕渠竟未見功若果能行南路諸貨皆至京
師而價賤矣平章政事駙馬元忠曰請求識河道者按視
其地竟不能行而罷二十五年五月盧溝決於上陽村先
是決顯通寨詔發中都三百里內民夫塞之至是復決朝
廷恐枉費工物遂令且勿治二十七年三月宰臣以孟家
山金口牌下視都城高一百四十餘尺止以射糧軍守之
恐不足恃儻遇暴漲人或爲姦其害非細若固塞之則所
灌稻田俱爲陸地種植禾麥亦非曠土不然則更立重隄


仍於岸上置埽官廨署及埽兵之室庶幾可以無虞也上是其言遣使塞之夏四月丙子詔封盧溝水神爲安平侯二十八年五月詔盧溝河使旅往來之津要令建石橋未行而世宗崩章宗大定二十九年六月復以涉者病河流湍急詔命造舟旣而更命建石橋明昌三年三月成勅命名曰廣利有司謂車駕之所經行使客商旅之要路請官建東西廊令人居之上曰何必然民間自應爲耳左丞守貞言但恐爲豪右所占况固利之人多止東岸若官築則東西兩岸俱稱亦便於觀望也遂從之六月盧溝隄決詔速遏塞之無令泛溢爲害右拾遺路鐸上䟽言當從水勢

分流以行不必補修玄同口以下丁村以上舊堤上命率
臣議之遂命工部尚書胥持國及路鐸同檢視其隄道

滹沱河大定八年六月滹沱犯真定命發河北西路及河
間太原冀州民夫二萬八千繕完其隄岸十年二月滹沱
河剏設巡河官二員十七年滹沱決白馬崗有司以聞詔
遣使固塞發真定五百里內民夫以十八年二月一日興
役命同知真定尹鵬沙虎同知河北西路轉運使徐偉監
護

漳河大定二十年春正月詔有司修護漳河隄所須工物
一切並從官給毋令擾民明昌二年六月漳河及盧溝隄

皆決詔命速塞之四年春正月癸未有司言修漳河隄埽
計三十八萬餘工詔依盧溝河例招被水闕食人充夫官
支錢米不足則調礪水人戶依上支給



志第八

志第九

金史二十八

開府儀同三司柱國錄軍國重事尚書右丞相驛國史領經筵事總裁臣脫脫奉

勅修

禮一郊



金人之入汴也時宋承平日久典章禮樂粲然備具金人
既悉收其圖籍載其車輅法物儀仗而北時方事軍旅未
遑講也既而卽會寧建宗社庶事草創皇統間熙宗巡幸
析津始乘金輅導儀衛陳鼓吹其觀聽赫然一新而宗社
朝會之禮亦次第舉行矣繼以海陵狼顧志欲併吞江南
乃命官修汴故宮繕宗廟社稷悉載宋故禮器以還外而

黷武內而縱欲其猷既失奚敢議禮樂哉世宗旣興復收
嚮所遷宋故禮器以旋廼命官鼎校唐宋故典沿革開詳
定所以議禮設詳校所以審樂統以宰相通學術者於一
事之宜適一物之節文旣上聞而始彙次至明昌初書成
凡四百餘卷名曰金纂修雜錄凡事物名數支分派引珠
貫綦布井然有序炳然如丹又圖吉凶二儀鹵簿十三節
以備大葬小鹵簿九節以備郊廟而命尚書左右司春官
兵曹太常寺各掌一本其意至深遠也是時寓內阜安民
物小康而維持幾百年者實此乎基嗚呼禮之爲國也信
矣夫而况關雎麟趾之化其流風遺思被於後世者爲何

如也宣宗南播疆宇日蹙旭日方升而燭火之然蔡流弗東而餘燼滅矣圖籍散逸既莫可尋而其宰相韓企先等之所論列禮官張暉與其子行簡所私著自公紀亦亡其傳故書之存僅集禮若干卷其藏史館者又殘缺弗完姑掇其郊社宗廟諸神祀朝覲會同等儀而爲書若夫凶禮則略焉蓋自熙宗海陵衛紹王之繼弑雖曰鹵簿十三節以備大葬其行乎否耶蓋莫得而考也故宣孝之喪禮存亦不復紀噫告朔餼羊雖孔子所不去而史之缺文則亦慎之作禮志

南北郊金之郊祀本於其俗有拜天之禮其後太宗卽位

乃告祀天地蓋設位而祭也天德以後始有南北郊之制
大定明昌其禮寢備南郊壇在豐宜門外當闕之巳地圓
壇三成成十二陛各按辰位壇墻三匝四面各三門齋宮
東北廚庫在南壇壇皆以赤土圻之北郊方丘在通玄門
外當闕之亥地方壇三成成爲子午卯酉四正陛方壇三
周四面亦三門朝日壇曰大明在施仁門外之東南當闕
之卯地門壇之制皆同方丘夕月壇曰夜明在彰義門外
之西北當闕酉地掘地汙之爲壇其中常以冬至日合祀
昊天上帝皇地祇於園丘夏至日祭皇地祇於方丘春分
朝日於東郊秋分夕月於西郊大定十一年始郊命宰臣

議配享之禮左丞石琚奏曰按禮記萬物本乎天本乎祖此所以祖配上帝也蓋配之者侑神作主也自外至者無主不止故推祖考配天尊之也兩漢魏晉以來皆配以一祖至唐高宗始以高祖太宗崇配垂拱初又加以高宗遂有三祖同配之禮至宋亦嘗以三帝配後禮院上議以爲對越天地神無二主由是止以太祖配臣謂冬至親郊宜從古禮上曰唐宋以私親不合古不足爲法今止當以太祖配又謂宰臣曰本國拜天之禮甚重今汝等言依古制築壇亦宜我國家絀遼宋主据天下之正郊祀之禮豈可不行乃以八月詔曰國莫大于祀祀莫大于天振古所

行舊章咸在仰惟太祖之基命詔我本朝之燕謀奄有萬
邦于今五紀因時制作雖增飾于國容推本奉承猶未遑
于郊見况天休茲至而年穀屢豐敢不敷繹曠文明昭大
報取陽升之至日將親享于圓壇嘉與臣工共圖熙事以
今年十一月十七日有事于南郊咨爾有司各揚乃職相
予肆祀罔或不欽乃於前一日遍見祖宗告以郊祀之事
其日備法駕鹵簿躬詣郊壇行禮○儀注齋戒用唐制大
祀散齋四日致齋三日中祀散齋二日致齋一日天子親
祀皆前期七日攝太尉誓亞終獻官親王陪祀皇族於宮
省皇族十五以上官雖不至七品者亦助祭受誓又誓百

官於尚書省攝太尉南向司徒北向監察御史在西監禮博士居東皆相向太常卿光祿卿在司徒後重行北向司天監光祿丞太廟令丞大樂令丞太官令丞良醞令廩犧令郊社丞司尊太祝奉禮郎協律郎諸執事官皆重行西上北向禮直官以誓文授攝太尉乃誓曰維某年歲次某甲某月某日某甲皇帝有事于南郊各揚其職其或不恭國有常刑禮直官贊曰七品以下官皆退餘皆再拜退誓於宮省之儀皆同於是皇帝散齋于別殿前致齋一日尚舍設御坐於大安殿當中南向設東西房於御坐之側設御幄於室內施簾於楹下享前三日陳設小次享前一日

設拜褥及皇帝版位皇帝飲福位及黃道瓊褥自玉輅下至升輿所及致齋之日通事舍人引文武五品以上官陪位如式諸侍衛之官各服其器服並結珮俱詣閣奉迎上水二刻侍中版奏外辦皇帝服袞冕結珮乘輿出警蹕侍衛如常儀皇帝卽御座東向坐通事舍人承傳殿上下俱拜訖西面贊各祗候一刻頃侍中跪奏臣某言請降就齋俛伏興還侍位皇帝降座入室羣官皆退諸執事官皆宿於正寢治事如故不弔喪問疾不判署刑殺文字不決罰罪人不與穢惡事致齋日惟祀事則行餘悉禁已齋而闕者通攝行事○陳設前祀五日儀鸞尚舍陳設齋宮有司設

扈從侍衛次於宮東西又設陪祀親王次宮東稍南西向
北上宗室子孫位於其後又設司徒亞終獻行事執事官
次於壇南外壝門之西東向北上重行異位又設天名房
在壇南外壝門之東西向大禮使次於其後皆西向又設
席大屋於壇外西北駐車輅以備風雪祀前三日尚舍設
大次於東壝外門內道北南向又設小次於壇下卯陞之
北南向有司設饌幔於東壝中門之北南向設兵衛各服
其器服守衛壝門每門二人郊社令帥其屬掃除壇之上
下及壝之内外乃爲燎位在南中壝東門之東壇之已位
又爲瘞坎在中壝內戌位祀前二日太樂令帥其屬設登

歌之樂於壇上稍南北向玉磬在午陛之西金鐘在午陛之東祝一在鐘前稍北敔一在磬前稍北東西相向歌工之次餘工各立於縣後琴瑟在前匏竹在後於壇下第一等上皆重行異位北向又設宮縣樂南壝外門之外八佾二舞表於樂前又設采茨樂於應天門前祀前一日奉禮郎升設皇帝版位於壇上辰巳之間北向又設皇帝飲福位於其左稍却北向又帥禮直官設亞終獻位於卯陛之東北西向北上司徒位於卯陛之東道南西向禮部尚書太常卿光祿卿禮部侍郎位各次之太常丞光祿丞又次之又設大禮使位於小次之左少却西向又設分獻官司

天監讀冊中書侍郎位於中壝門道北西向郊社令廩犧
令太官令良醢令位於其後又設郊社丞太祝奉禮郎以
下諸執事官於其後皆西向重行異位又設從祀文武羣
官一品至五品位於中壝門內道南西向皆重行立又設
助奠祝史齋郎位於東壝門外道北西向又設陪祀皇族
於道南西向六品至九品從祀群官又於其南皆西向重
行異位各依其品又設監察御史二員一員在午陛之西
南一員在子陛之西北皆東向又設監禮博士二員一員
在午陛之東南一員在子陛之東北皆西向又設太樂令
位於樂簾之間稍東西向協律郎位於樂簾之西東向又

設奉禮郎於壇南稍東西向贊者次之司尊位於酌尊所俱北向又設牲牓於外壇東門之外西向饌牓於其北稍西南向牲牓之東牲位太史太祝各位於牲後俱西向又設禮部尚書太常卿光祿卿位於牲牓南稍北西向太常丞光祿丞太官令位於其後監祭御史監禮博士於禮部尚書位之西稍却北向廩犧令位在牲位西南北向又陳禮饌於饌牓之前案上末後三刻陳饌之時又設禮部尚書太常卿光祿卿位於案前稍東北上西向太常丞光祿丞太官令位於其後西向又設監祭御史監禮博士位於案前稍西北上東向又設異寶嘉瑞位於宮縣西北太府

少監位於寶後諸州歲貢位於宮縣東北戶部郎中位於其後天子八寶位於宮縣西南符寶郎八員各於寶後伐國毀寶位於宮縣東南少府少監位於其後又設大樂令位於宮縣之北稍東協律郎二在大樂令南東西相向司天監未後二刻同郊社令升設昊天上帝皇地祇神座於壇上北方南向地祇位在東稍却席皆以藁秸太祖配位座於東方西向席以蒲越五方帝日月神州地祇天皇大帝北極神座於壇上第一等席皆藁秸內官五十四座五神五官嶽鎮海瀆二十九座於壇第二等中官一百五十有八座崑崙山林川澤二十一座於壇上第三等外官一

百六座丘陵墳衍原隰三十座於內壝之內衆星三百六十座在內壝之外席皆以莞神座版各設於座首又設禮神玉俛告潔畢權徹去壇上及第一等神位祀日前五刻重設奉禮郎同司尊及執事者設天地配位各左十有一籩右十有一豆俱爲三行登三在籩豆間簋一簋一於登前簋在左簋在右各於神座前藉以席又設天地位太尊各二著尊各二犧尊各二山罍各二壇上東南隅配位著尊二犧尊二象尊二在天地位酒尊之東俱北向西上皆有坫加勺罍爲酌尊所又天地位象尊各二壺尊各二山罍各四在壇下午陛之南北向西上配位壺尊二山罍四

在西陞之北東向北上皆有站設而不酌亦左以明水右以玄酒又設五方帝日月神州地祇天皇大帝北極第一等皆左八籩右八豆登在籩豆間簋一簋一在登前爵站一在神座前第二等內官五十四座五神五官嶽鎮海濱二十九座每座籩二豆二簋一簋一俎一爵站一第三等中官一百五十八座崑崙山林川澤二十一座及內壝內外官一百六十座丘陵墳衍原隰三十座內壝外衆星三百六十座每位籩二豆二簋一簋一俎一爵一又設第一等每位太尊二著尊二皆有站加勺第二等每陞山尊二第三等每位屬尊二內壝內外每辰概尊二皆加勺自第

二等已下皆用匏爵先洗拭訖置於尊所其尊所皆在神位之左凡祭器皆藉以席籩豆各加巾蓋又設天地及配位籩一豆一簋一盥一俎四及毛血豆各一并第一等神位每位俎二於饌幔內又設皇帝洗二於卯陛下道北南向盥洗在東爵洗在西匱在東巾在西籩南肆實玉爵坩又設亞終獻洗位在小次之東南向盥洗在東爵洗在西加勺籩在西南肆加巾又設第一等分獻官盥洗爵洗位及第二等分獻官盥洗位各於其辰陞道之左罍在洗左籩在洗右俱內向執罍籩者位於其後太府監少府監祀前一日未後二刻帥其屬升壇陳玉幣昊天上帝以蒼璧

蒼幣皇地祇以黃琮黃幣配位以蒼幣黃帝以黃琮青帝以青珪赤帝以赤璋大明以青珪璧白帝以白琥黑帝以玄璜北極以青珪璧天皇大帝以玄珪璧神州地祇以玄色兩珪有邸皆置於匣五帝之幣各從其方色凡幣皆陳於篚設訖俟告潔訖權徹去祀日重設祀日丑前五刻禮部設祝冊神座之右皆藉以案太常卿明燈燎戶部郎中設諸州歲貢於宮縣東北金爲前列玉帛次之餘爲從列皆藉以席立於歲貢之後北向太府監少府監設異寶嘉瑞於宮縣西北上瑞居前中下次之皆藉以席立於寶後北向少府少監設伐國毀寶於宮縣東南皆藉以席立於

寶後北向符寶郎設八寶於宮縣西南各分立於寶南皆
北向司天監太府監少府監郊社令奉禮郎升設昊天
帝皇地祇配位及壇上第一等神座又設玉幣各於其位
太祝取瘞玉加於幣以禮神之玉各置於神座前乃退光
祿卿帥其屬入實祭器昊天上帝皇地祇配位每位遵三
行以右爲上形鹽在前魚鱸糗餌次之第二行榛實在前乾
桃乾榛乾棗次之第三行乾菱在前乾芡乾栗鹿脯次之
豆三行以左爲上芹菹在前筍菹葵菹次之第二行韭菹
在前菁菹魚醢兔醢次之第三行豚胎在前醢醢醢食鹿
臠次之簋黍簋稷登皆大羹第一等壇上一十位每位皆

實籩三行以右爲上形鹽在前魚鱸次之第二行乾棗在前桃棗次之第三行乾芡在前榛實鹿脯次之豆三行以左爲上芹菹在前荀菹次之第二行菁菹在前韭菹魚醢次之第三行豚胎在前醯醢次之鹿醢次之簋黍簋稷登大羹第二第三等每位籩二鹿脯乾棗豆二鹿醢菁菹俎羊一段內壝內內壝外每位籩鹿脯豆鹿醢俎羊一段良醢令帥其屬入實尊罍昊天上帝皇地祇大尊爲上實以沚齊著尊次之實以醴齊犧尊次之實以盎齊象尊次之實以醴齊壺尊次之實以沚齊山罍爲下實以三酒配位著尊爲上實以沚齊犧尊次之實以醴齊象尊次之實以

盞齊壺尊次之實以醞齊山罍爲下實以三酒第一等每位大尊實以沆齊著尊實以醴齊第二等山尊實以醞齊第三等及內壝內蜃尊實以沆齊內壝外及衆星概尊實以三酒○省牲器祀前一日午後八刻去壇二百步禁止行人未後二刻郊社令丞帥其屬掃除壇之上下司尊奉禮郎帥執事者以祭器入設於位司天監設神位太府監少府監陳玉幣於篚未後三刻禮直官引廩犧令與諸太祝祝史以牲就位又禮直官贊者分引禮部尚書太常卿光祿卿禮部侍郎太常丞監祭御史監禮博士廩犧令太官令太官丞詣內壝東門外省牲位立定乃引禮部尚書

侍郎太常丞及監祭御史監禮博士升自卯階視濯滌執
事者皆舉皋告潔俱畢降復位禮直官稍前曰告潔畢請
省牲禮部尚書侍郎及太常卿丞稍前省牲訖退復位次
引光祿卿丞巡牲一匝光祿卿退光祿丞西向折身曰備
訖乃復位次引廩犧令巡牲一匝西向躬身曰充又引諸
祝史巡牲一匝首一負西向躬身曰膺畢俱復位禮直官
稍前曰請省饌乃引禮部尚書侍郎太常卿丞各還齋所餘官廩犧
禮直官引禮部尚書侍郎太常卿丞各還齋所餘官廩犧
令與諸太祝祝史以次牽牲詣厨授太官令丞次引光祿
卿丞監祭監禮詣厨省鼎鑊視滌濯畢乃還齋所晡後一

刻太官令帥宰人以鸞刀割牲祝史各取毛血實以豆置於饌幔遂烹牲祝史乃取瘞血貯於盤○奠玉幣祀日丑前五刻亞終獻司徒已下應行事陪從羣官各服其服就次司天監復設壇上及第一等神位太府監少府監陳玉幣太常卿郊社令丞明燭燎光祿卿丞實籩豆簋簠尊壺俟監祭監禮案視訖徹去巾蓋大樂令帥工人布於宮縣之內文舞八佾立於縣前表後武舞八佾各爲四佾立於宮縣左右引舞執纛等在前又引登歌樂工由卯陞而升各就其位歌擊彈者坐吹者立奉禮郎贊者先入就位餘禮直官贊者分引分獻官監祭御史監禮博士諸執事及

太祝祝史齋郎助奠執尊壘舉等官入自中壝東門當
壇南重行西上北向立定奉禮郎贊拜分獻官以下皆再
拜訖奉禮贊曰各就位贊者禮直官分引監祭御史監禮
博士按視壇之上下糾察不如儀者退復位禮直官引司
徒入就位西向立禮直官引博士博士引亞獻自東壝偏
門入就位西向立又禮直官引終獻次於其位祀日未明
一刻通事舍人引侍中詣齋殿跪奏請中嚴俛伏興又少
頃乃跪奏外辦俟尚輦進輿乃跪奏稱具官臣某請皇帝
降座升與皇帝至大次乃跪奏稱具官臣某請皇帝降輿
皇帝入次卽位於大次外質明詣次前跪奏請中嚴少頃

又奏外辦訖太常卿乃當次前跪稱具官臣某請皇帝行事倭伏興凡跪奏准此皇帝出次乃前導至中壇門殿中監進大主太常卿奏請執大主入自正門皇帝入小次位西向立太常卿乃與博士分左右立定乃奏有司謹具請行事降神六成樂止太常卿別一員乃升煙瘞血訖乃奏拜訖俟侍中升壇詣盥洗位至位奏請摺大主盥手訖奏請悅手皇帝悅手訖奏請執大主乃引至壇上殿中監進鎮圭乃奏請摺大主執鎮圭皇帝執鎮圭詣昊天上帝神座前奏請跪奠鎮圭皇帝奠訖執大主倭伏興侍中進玉幣乃奏請摺大主跪奠玉幣訖乃奏請執大主倭伏興少

退又奏請再拜詣皇地祇及配位奠鎮圭玉幣並如儀配位唯奏請奠鎮圭及幣奠玉幣畢皇帝還版位乃奏請還小次釋大圭皇帝入小次乃立於小次之南稍東以俟皇帝將奠配位之幣也贊者分引第一等分獻官詣盥洗位擗笏盥手悅手執笏各由其陞升唯不由午陞詣神前擗笏跪太祝以玉幣授之奠訖俛伏興再拜訖各由本陞降復位初分獻將降也禮直官引諸祝史齋郎應助奠者再拜祝史各奉毛血之豆入各由其陞升諸太祝迎取於壇上奠訖退立於尊所○進熟奠玉幣訖降還小次有司先陳牛鼎三羊鼎三豕鼎三魚鼎三各在饌右太官令丞帥

進饌者詣厨以匕升牛羊豕魚自鑊各實於鼎牛羊豕皆
肩臂肫肫胙正脊各一長脇二短脇二代脇二凡十一體
牛豕皆三十斤羊十五斤魚十五頭一十五斤實訖冪之
祝史二人以扃對舉一鼎牛鼎在前羊豕次之魚又次之
有司執匕以從各陳於每位饌慢位從祀壇上第一等五
方帝大明夜明天皇大帝神州地祇北極皆羊豕之體並
同光祿卿帥祝史齋郎太官令丞各以匕升牛羊豕魚於
俎肩臂肫在上端肫胙在下端脊脇在中魚即橫置頭在
尊位設去鼎冪光祿卿丞同太官令丞實籩豆簠簋籩實
以粉飡豆實以糝食簠實稻簋實粱俟皇帝還小次樂止

禮直官引司徒出詣饌幔所與薦籩豆簠簋俎齋郎各奉
天地配位之饌司徒帥太官令以序入內壝正門樂作至
壇下俟祝史進徹毛血豆降自卯陞以次出訖司徒與薦
籩豆簠簋俎齋郎奉昊天上帝皇地祇之饌升自午陞太
官令丞與薦籩豆簠簋俎齋郎奉配位及第一等神位之
饌升自卯陞各位太祝迎於壇陞之道間於昊天上帝位
司徒搢笏北向跪奉粉養籩在糗餌之前糝食豆在醢醢
之前簠在簋右皆在登前牛俎在豆前羊豕魚俎次之以
右爲上司徒僂伏興奉饌者奉訖皆出笏就位一拜司徒
次詣皇地祇奉簠簋如上儀配位亦同司徒及奉天地配

位饌者以次降太官令帥奉第一等神位之饌各於其位
並如前儀俱畢樂止司徒太官令以下皆就位訖侍中升
自卯陞立於昊天上帝酌尊所以俟太常卿乃當次前俛
伏跪奏請皇帝詣盥洗位俛伏興皇帝出次殿中監進大
圭乃奏請執大圭至盥洗位奏請搢大圭盥手皇帝盥手
訖奏請悅手皇帝悅手訖奏請執大圭乃詣爵洗位至位
奏請搢大圭受爵又奏請洗爵皇帝洗爵訖奏請拭爵皇
帝拭爵訖奏請執大圭以爵授奉爵官皇帝詣昊天上帝
酌尊所執爵良醞令舉冪侍中跪酌太尊之汎齊酌訖皇
帝以爵授侍中皇帝乃詣昊天上帝神座前侍中進爵乃

奏請搢大圭跪執爵三祭酒訖奏請奠爵奠爵訖奏請執大圭俛伏興又奏請少退立俟中書侍郎讀冊文訖乃奏請再拜詣皇地祇位及配位並如上儀獻畢皇帝還版位乃奏請還小次釋大圭皇帝入小次太常卿立於小次東南禮直官引博士博士引亞獻詣盥洗位搢笏盥手悅手訖詣爵洗位搢笏洗爵拭爵訖以爵授執事者執笏升自卯陛詣昊天上帝酌尊所西向立執事者以爵授之乃搢笏執爵執尊者舉冪良醞令跪酌著尊之醴齊酌訖復以爵授執事者執笏詣昊天上帝神座前初亞獻至盥洗位文舞退武舞進樂作亞獻詣昊天上帝神座前搢笏跪執

事者以爵授之乃執爵三祭酒奠爵執笏俛伏興少退再拜次詣皇地祇及配位並如上儀獻畢降復位禮直官引博士博士引終獻詣盥洗位盥手洗爵升壇奠獻並如上儀初終獻將升壇禮直官分引第一等分獻官詣盥洗位搢笏盥手俛手執笏各由其陞唯不由午陞諸神位酌尊所執事者以爵授之乃酌汎齊訖以爵授執事者共詣神座前搢笏跪執事者以爵授之乃執爵三祭酒奠爵執笏俛伏興少退再拜訖各引還本位初第一等分獻官將升贊引引第二等第三等內壇內外衆星位分獻各詣盥洗位搢笏盥手俛手酌酒奠拜並同上儀祝史齋郎以次助

奠訖各還本位諸太祝各進徹籩豆各一少移故處樂作
卒徹樂止初終獻禮畢降復位太常卿乃當次前俛伏跪
奏請皇帝詣飲福位皇帝出次殿中監進大圭乃奏請執
爵三祭酒又奏請啐酒皇帝啐酒訖以爵授侍中乃奏請
受胙侍中再以爵酒進乃奏請受爵飲福皇帝飲福訖奏
請執大圭俛伏興又奏請再拜訖乃導還版位西向立俟
送神樂止乃奏請詣望燎位至位南向立俟火半柴乃跪
奏具官臣某言禮畢皇帝還大次出中壝門外奏請釋大
圭皇帝入大次初終獻禮畢司徒侍中太祝各升自卯陛
太祝持胙俎進臧天地配位前胙肉加於俎皆取前脚第

二節又以黍稷飯共置一簋奉詣司徒侍中後北向立俟

皇帝至飲福位太常卿奏請皇帝搢大圭啐酒訖司徒乃進胙俎皇帝受胙訖奉禮郎贊曰賜胙贊者唱曰再拜在位者皆再拜送神樂一成止皇帝既入大次更通天冠絳紗袍升輿至齋宮乘金輅通事舍人引門下侍郎當輅前跪奏稱具官臣某請車駕進發至侍臣上馬所乃跪奏具官臣某請車駕少駐勅侍臣上馬侍中稱制可乃退傳制稱侍臣上馬侍臣上馬畢乃跪奏稱具官臣某請勅車右升千牛將軍升訖跪奏稱具官臣某請車駕進發車駕動前中後三部鼓吹凡十二隊齊作應行禮陪從祀官先詣

應天門奉迎再拜大樂令先詣應天門外准備奏樂如儀
訖擇日稱賀

承安元年將郊禮官言禮神之玉當用眞玉燔玉當用次
玉昔大定十一年天地之玉皆以次玉代之臣等疑其未
盡禮貴有恒不能繼者不敢以獻若燔眞玉常祀用之恐
有時或闕反失禮制若從近代之典及本朝儀禮眞玉禮
神次玉燔瘞於禮爲當近代郊自第二等升天皇大帝北
極於第一等前八位舊各有禮玉燔玉而此二位尚無之
按周禮典瑞云以圭璧祀日月星辰近代禮九宮貴神大
火星位猶用周禮之說其天皇大帝北極二位固宜用禮

神之玉及燔玉也上命俱用真玉省臣又奏前時郊天地
配位各用一犢五方帝日月神州天皇大帝北極十位皆
大祀亦當用犢當時止以羊代第二等以下從祀神位則
分剖羊豕以獻竊意天地之祀籩豆尚多者以備陰陽之
物鼎俎尚少者以人之烹薦無可以稱其德則貴質而已
故天地日月星辰之位皆用一俎前時第一等神位偏用
二俎似爲不倫今第一等神位亦當各用犢一餘位以羊
豕分獻及朝享太廟則用犢十二上從之

志第九

志第十

金史二十九

開府儀同三司柱國錄軍國重事前中書右丞相穆國史領經筵事都總裁臣脫脫奉

勅修

禮二

方丘儀 朝日夕月儀
高禘

方丘儀齋戒祭前三日質明有司設三獻以下行事官位於尚書省初獻南面監祭御史位於西東向監禮博士位於東西向俱北上司徒亞終獻位於南北向次光祿卿太常卿次第一等分獻官司天監次第二等分獻官光祿丞郊社令大樂令良醞令廩犧令司尊彝次內壝內外分獻官太祝官奉禮郎協律郎諸執事官就位立定次禮直官

引初獻就位初獻讀誓曰今年五月幾日夏至祭皇地祇於方丘所有攝官各揚其職其或不敬國有常刑讀畢禮直官贊七品以下官先退餘官對拜訖退散齋二日宿於正寢治事如故齋禁並如郊祀守壝門兵衛與大樂工人俱清齋一宿行禮官前期習儀於祠所陳設祭前三日所司設三獻官以下行事執事官次於外壝東門之外道南北向西上隨地之宜又設饌幕於內壝東門之外道北南向祭前二日所司設兵衛各服其服守衛壝門每門二人大樂令帥其屬設登歌之樂於壇上如郊祀郊社令帥其屬掃除壇之上下爲瘞坎在內壝外之壬地祭前一日司

天監郊社令各服其服帥其屬升設皇地祇神座於壇上
北方南向席以藁秸又設配位神座於東方西向席以蒲
越又設神州地祇神座於壇之第一等東南方席以藁秸
又設五神五官嶽鎮海瀆二十九座於第四等階之間各
依方位又設崑崙山林川澤二十一座於內壝之內又設
丘陵墳衍原隰三十座於內壝外席皆以莞又設神位版
各於坐首子陛之西水神玄冥北嶽北鎮北海北瀆於壇
之第二等北山北林北川北澤於內壝內北丘北陵北墳
北衍北原北隰於內壝外皆各爲一列以東爲上如陛之
北水神勾芒東嶽長白山東鎮東海東瀆於壇之第二等

東山東林東川東澤於內壝內東丘東陵東墳東衍東原
東隰於內壝外皆各爲一列以南爲上午陞之東神州地
祇於壇之第一等火神祝融南嶽南鎮南海南瀆於壇之
第二等南山南林南川南澤於內壝內南丘南陵南墳南
衍南原南隰於內壝外皆各爲一列以西爲上午陞之西
土神后土中嶽中鎮於壇之第二等中山中林中川中澤
於內壝內中丘中陵中墳中衍中原中隰於內壝外皆各
爲一列以南爲上酉陞之南金神蓐收西嶽西鎮西海西
瀆於壇之第二等崑崙西山西林西川西澤於內壝內西
丘西陵西墳西衍西原西隰於內壝外皆各爲一列以北

爲上其皇地祇及配位神州地祇之坐并禮神之玉設訖
俟告饗畢權徹祭日早重設其第二等以下神坐設定不
收奉禮郎禮直官又設三獻官位於卯陞之東稍北西向
司徒位於卯陞之東道南西向太常卿光祿卿次之第一
等分獻官司天監位於其東光祿丞郊社令太官令廩犧
令位又在其東每等異位重行俱西向北上又設太祝奉
禮郎及諸執事位於內壝東門外道南每等異位重行俱
西向北上設監祭御史二位一於壇下午陞之西南一於
子陞之西北俱東向設監禮博士二位一於壇下午陞之
東南一於子陞之東北俱西向奉禮郎位於壇之東南西

向協律郎位於樂簾西北東向大樂令位於樂簾之間西
向司尊彝位於酌尊所俱北向設望瘞位坎之南北向又
設牲牓位於內壝東門之外西向太祝祝史各位於牲後
俱西向設省饌位於牲西太常卿光祿卿太官令位於牲
北南向西上監祭監禮位在太常卿之西稍却西上廡犧
令位於牲西南北向又陳禮饌於內壝東門之外道北南
向設省饌位於禮饌之南太常卿光祿卿太官令位在東
西向監祭監禮位在西東向俱北上設祝版於神位之右
司尊及奉禮郎帥其屬設玉幣篚於酌尊所次及邊豆之
位正配位各左有十一邊右有十一豆俱爲三行登三在

邊豆間鉶三在登前簋一盞一各在鉶前又設尊壘之位
皇地祇太尊二著尊二犧尊二山壘二在壇上東南隅配
位著尊二犧尊二象尊二山壘二在正位酒尊之東俱北
向西上皆有玷加勺冪爲酌尊所又設皇地祇位象尊二
壘尊二山壘四在壇下午陛之西配位犧尊二壘尊二山
壘四在酉陛之北東向北上皆有玷加冪設而不酌神州
地祇位左八邊右八豆登一在邊豆間簋一盞一在登前
爵玷一在神座前又設第二等諸神位每位邊二豆二簋
一盞一俎一爵玷一內壝之內外諸神每位邊一豆一盞
一簋一俎一爵玷一陳列皆與上同又設神州地祇太尊

二著尊二皆有玷第二等諸神每方山尊二內壝內外每
方屢尊二內壝內外每方概尊二皆加勺冪又設正配位
邊一豆一簋一簋一俎三及毛血豆一并神州地祇位俎
一各於饌幕內又設二洗於壇下卯陞之東北向盥洗在
東爵洗在西並有壘加勺篚在洗西南肆實以巾爵洗之
篚實以匏爵加玷又設第一分獻官盥洗爵洗位第二等
以下分獻官盥洗位各於其方道之左壘在洗左篚在洗
右俱內向執爵篚者各於其後祭日丑前五刻司天監郊
社令帥其屬升設皇地祇及配位神坐於壇上設神州地
祇坐於第一等又設玉幣皇地祇玉以黃琮神州地祇玉

以兩圭有邸皆置於匣正配位幣並以黃色神州地祇幣以玄色五神五官嶽鎮海瀆之幣各從其方色皆陳於籩太祝取瘞玉加於幣以禮神之玉各置於神座前光祿卿帥其屬入實正配位籩豆籩三行以右爲上豆三行以左爲上其實並如郊祀登實以大羹籩實以和羹又設從祭第一等神州地祇之饌籩三行以右爲上豆三行以左爲上其實並如郊祀登實以大羹籩實以稷籩實以黍第二等每位左二籩栗在前鹿脯次之右二豆菁菹在前鹿脯次之籩實以稷籩實以黍俎一羊一豕內壝內外每位左籩一鹿脯右豆一鹿脯籩稷黍俎以羊豕醢令帥其屬

入實酒尊皇地祇太尊爲上實以汎齊著尊次之實以醴
齊犧尊次之實以盎齊象尊次之實以醍齊壺尊次之實
以沈齊山罍爲下實以三酒配位著尊爲上實以汎齊犧
尊次之實以醴齊象尊次之實以盎齊壺尊次之實以醍
齊山罍爲下實以三酒皆左實明水右實玄酒皆尚醞代
次實從祭第一等神州地祇酒尊太尊爲上實以汎齊著
尊次之實以醴齊第二等山尊實以醍齊內壺內蜃尊實
以汎齊內壺外概尊實以三酒以上尊皆左以明水右以
玄酒皆尚醞代之太常卿設燭於神座前省牲器祭前一
日午後八刻去壇二百步禁止行者未後二刻郊社令帥

其屬掃除壇之上下司尊與奉禮郎帥執事者以祭器入
設於位郊社令陳玉幣於篚未後三刻廩犧令與諸太祝
祝史以牲就省位禮直官贊者分引太常卿光祿卿丞監
禮祭太官令等詣內壝東門外省牲位其視滌濯告潔省
牲饌並同郊祀俱畢廩犧令諸太祝祝史以次牽牲詣厨
授太官令次引光祿卿以下詣厨省鼎鑊視滌漑乃還齋
所哺後一刻太官令帥宰人以鸞刀割牲祝史各取毛血
實以豆置於饌幔遂烹牲又祝史取瘞血貯於盤奠玉幣
祭日丑前五刻獻官以下行事官各服其服有司設神位
版陳玉幣實豆簋簠尊壺俟監祭監禮按視壇之上下

乃撤去蓋幕大樂令帥工人及奉禮郎贊者先入禮直官
贊者分引分獻官以下監祭監禮諸大祝祝史齋郎與執
事者入自南壇東門當壇南重行北向西上立定奉禮郎
贊拜獻官以下皆再拜訖以次分引各就壇陞上下位次
引監祭監禮按視壇之上下訖退復位禮直官分引三獻
官以下行事官俱入就位行禮官皆自南壇東門入禮直
官進立初獻之左白曰有司謹具請行事退復位協律郎
高舉笏執麾者舉麾俛伏興工鼓祝樂作坤寧之曲八成
偃麾戛敔樂止俟太常卿瘞血訖奉禮郎贊拜在位者皆
再拜又贊諸執事者各就位禮直官引諸執事各就其位

俟太祝跪取玉幣於篚立於尊所諸位太祝亦各取玉幣
立於尊所禮直官引初獻詣盥洗位樂作肅寧之曲至位
北向立樂止搯笏盥手悅手執笏詣壇樂作肅寧之曲凡
初獻升降皆作肅寧之曲升自卯階至壇樂止詣皇地祇
神座前北向立樂作靜寧之曲搯笏跪太祝加玉於幣西
向跪以授初獻初獻受玉幣奠訖執笏俛伏興再拜訖樂
止次詣配位神座前東向立樂作億寧之曲奠幣如上儀
樂止降自卯陞樂作復位樂止初獻將奠配位之幣贊者
引第一等分獻官詣盥洗位搯笏盥手悅手執笏由卯陞
詣神州地祇神座前搯笏跪太祝以玉幣授分獻官分獻

官受玉幣奠訖執笏俛伏興再拜訖退初第一分獻官將升贊者引第二分獻官詣盥洗位盥手帨手執笏各由其陞升唯不由午陞詣於首位神座奠幣如上儀餘以次祝更齋郎助奠訖各引還位初獻奠幣將畢祝史奉毛血豆各由午陞升詣太祝迎於壇上進奠於正配位神座前太祝與祝史俱退立於尊所進熟初獻既升奠玉幣有司先陳牛鼎二羊鼎二豕鼎二於神厨各在鑊右太官帥進饌者詣厨以七升牛羊豕自鑊實於各鼎牛羊豕各肩臂膈肫胙正脊一橫脊一長脇一短脇一代脇一皆二骨一並霽之祝史以局各對舉鼎有司執匕以從陳於饌幔內從

祀之俎實以羊更陳於饌幔內光祿卿實以藟豆簠簋藟
實以粉餐豆實以糝食簠實以稷簠實以黍實訖去鼎之
高冪七加於鼎太官令以匕升牛羊豕載於俎肩臂臠在
上端肫膈在下端脊脅在中俟初獻還位樂止禮直官引
司徒出詣饌所同薦藟豆簠簋俎齊郎各奉皇地祇配位
之饌升自卯陞諸太祝各迎於壇上司徒詣皇地祇神座
前搢笏奉藟豆簠簋次奉俎北向跪奠訖執笏俛伏興設
遷於糝餌之前豆於醢醢之前簠簋在登前俎右邊前次
於卯陞奉配位之饌東向跪奠於神座前並如上儀各降
自卯陞還位太官令又同齋郎奉神州地祇之饌升自卯

陞太祝迎於壇陞之道間奠於神座前左邊前訖樂止太

官令進饌者降自卯陞還位禮直官引初獻官詣盥洗位

樂作至位樂止北向立搢笏盥手悅手執笏詣爵洗位至

位北向立搢笏洗爵拭爵以授執事者執笏詣壇樂作升

自卯陞至壇上樂止詣皇地祇酌尊所西向立執事者以

爵授初獻初獻搢笏執爵司尊舉冪醴令跪酌太尊之

汎齊酌訖初獻以爵授執事者執笏詣皇地祇神座前北

向立搢笏跪執事者以爵授初獻初獻執爵三祭酒於茅

苴奠爵三獻奠爵皆執事者受以興執笏俛伏興少退跪樂止舉祝官

跪對舉祝版讀祝太祝東向跪讀祝訖俛伏興舉祝奠版

於案再拜興次詣配位酌尊所執事者以爵授初獻搢笏
執爵司尊舉冪良醢令跪酌著尊之汎齊樂作太簇宮保
寧之曲初獻以爵授執事者執笏詣配位神座前東向立
搢笏跪執事者以爵授初獻初獻執爵三奠酒於茅苴奠
爵執笏俛伏興少退跪樂止讀祝訖樂作就拜興拜興降
自卯陞讀祝舉祝俱從樂作復位樂止次引亞獻詣盥洗
位北向立搢笏盥手帨手執笏詣爵洗位北向立搢笏洗
爵拭爵授執事者執笏升自卯陞詣皇地祇酌尊所西向
立執事者以爵授亞獻亞獻搢笏執爵司尊舉冪良醢令
酌著尊之醴齊酌訖以爵授執事者執笏詣皇地祇神座

南北向立搢笏跪執事以爵授亞獻亞獻執爵三祭酒於
茅苴奠爵執笏俛伏興少退再拜次詣配位酌獻如上儀
唯酌犧尊爲異樂止降復位次引終獻詣盥洗位盥手帨
手洗爵拭爵以爵授執事者升壇正位酌犧尊之盞齊配
位酌象尊之醴齊奠獻並如亞獻之儀禮畢降復位初終
獻將升贊者引第一等分獻官詣盥洗位搢笏盥手帨手
洗爵拭爵以爵授執事者執笏詣神州地祇酌尊所搢笏
執事者以爵授獻官獻官執爵執事者酌太尊之汎齊酌
訖以爵授執事者進詣神座前搢笏跪執事者以爵授獻
官獻官執爵三祭酒於茅苴奠爵俛伏興少退跪再拜訖

還位初第一等分獻官將升贊者分引第二等分獻官詣
盥洗位搢笏盥手悅手執笏詣酌尊所執事以爵授分獻
官酌以授執事者進詣首位神座前奠獻並如上儀祝史
齋郎以次助奠訖各引還位諸獻俱畢諸太祝進徹遵豆
遵豆各一少移故處樂作豐寧之曲卒徹樂止奉禮官贊
曰賜胙衆官再拜樂作一成止初送神樂止引初獻官詣
望座位樂作太簇宮肅寧之曲至位南向立樂止初在位
官將拜諸太祝祝史各奉篚進詣神座前玉幣從祭神州
地祇以下並以俎載牲體并取黍稷飯爵酒各由其陞降
壇北詣瘞坎實於坎中又以從祭之位禮幣皆從瘞禮直

四百五十九
官曰可瘞東西六行寘土半坎禮直官贊禮畢引初獻出
禮官贊者各引祭官及監祭監禮太祝以下俱復壇南北
向立定奉禮郎贊曰再拜監祭以下皆再拜訖奉禮以下
及工人以次出光祿卿以胙奉進監祭監禮展視其祝版
燔於齋坊

朝日夕月儀齋戒陳設省牲器奠玉幣進熟其節並如大
祀之儀朝日玉用青璧夕月用白璧幣皆如玉之色牲各
用羊一豕一有司攝三獻司徒行事其親行朝日金初用
本國禮天會四年正月始朝日于乾元殿而後受賀天眷
二年定朔望朝日儀皇帝服靴袍百官常服有司設爐案

御褥位于所御殿前陞上設百官褥位于殿門外皆向日
宣徽使奏導皇帝至位南向再拜上香又再拜閤門皆相
應贊殿門外臣僚陪拜如常儀大定二年以無典故罷十
五年言事者謂今正旦并萬春節宜令有司定拜日之禮
有司援據漢唐春分朝日升煙奠玉如圜丘之儀又按唐
開元禮南向設大明神位天子北向皆無南向拜日之制
今已奉勅以月朔拜日宜遵古制殿前東向拜詔姑從南
向其日先引臣僚於殿門外立陪位立殿前班露臺左右
皇帝於露臺香案拜如上儀十八年上拜日於仁政殿始
行東向之禮皇帝出殿東向設位宣徽贊拜皇帝再拜上

香訖又再拜臣僚並陪拜依班次起居如常儀

高禘明昌六年章宗未有子尚書省臣奏行高禘之祀乃築壇於景風門外東南端當闕之卯辰地與園丘東西相望壇如北郊之制歲以春分日祀青帝伏犧氏女媧氏九三位壇上南向西上姜嫄簡狄位於壇之第二層東向北上前一日未三刻布神位省牲器陳御弓矢弓韣於上下神位之右其齋戒奠玉幣進熟皆如大祀儀青帝幣玉皆用青餘皆無玉每位牲用羊一豕一有司攝三獻司徒行事禮畢進胙倍於他祀之肉進胙官佩弓矢弓韣以進上命后妃嬪御皆執弓矢東向而射廼命以次飲福享胙

志第十



志第十一

金史三十

開禧司在國祚國事司中書省舊修國祚經筵事都總整脫脫奉

勅修

禮三宗廟朝事

掃拾時事儀

金初無宗廟天輔七年八月太祖葬上京宮城之西南建寧神殿于陵上以時薦享自是諸京皆立廟惟在京師者則曰太廟天會六年以宋二帝見太祖廟者是也或因遼之故廟安置御容亦謂之廟天眷三年熙宗幸燕及受尊號皆親享恭謝是也皇統三年初立太廟八年太廟成則上京之廟也貞元初海陵遷燕乃增廣舊廟奉遷祖宗神

主于新都三年十一月丁卯奉安于太廟正隆中營建南
京宮室復立宗廟南渡因之其廟制史不載傳志雜記或
可槩見今附之汴京之廟在宮南馳道之東殿規一屋四
注限其北爲神室其前爲通廊東西二十六楹爲間二十
有五每間爲一室廟端各虛一間爲夾室中二十三間爲
十一室從西三間爲一室爲始祖廟祔德帝安帝獻祖昭
祖景祖祧主五餘皆兩間爲一室或曰惟第二第三室兩
間餘止一間爲一室總
十有七間世祖室祔肅宗穆宗室祔康宗餘皆無祔每室門一
牖一門在左牖在右皆南向石室之龕於各室之西壁東
向其世祖之龕六南向者五東向者一其二其三俱二龕

餘皆一室一龕總十八龕祭日出主於北墉下南向櫛袷則並出主始祖東向群主依昭穆南北相向東西序列室戶外之通廊殿階二級列陛三前井亭二外作重垣四練南東西皆有門內垣之隅有樓南門五闔餘皆三中垣之外東北冊寶殿也太常官一人季視其封緘謂之黜寶內垣之南曰大次東南爲神庖廟門翼兩廡各二十有五楹爲齋郎執事之次西南垣外則廟署也神門列戟各二十有四植以木鐻戟下以板爲掌形畫二青龍下垂五色帶長五尺享前一日則縣戟上祭畢藏之

聖次大定十二年議建閔宗別廟禮官援晉惠懷唐中宗

後唐莊宗升祔故事若依此典武靈皇帝無嗣亦合升祔然中宗之祔始則爲虛室終則增至九室惠懷之祔乃遷豫章潁川二廟莊宗之祔乃桃懿祖一室今太廟之制除桃廟外爲七世十一室如當升祔武靈卽須別桃一廟荀子曰有天下者事七世若旁容兄弟上毀祖考則天子有不得事七世者矣伏觀宗廟世次自睿宗上至始祖凡七世別無可桃之廟晉史云廟以容主爲限無拘常數東晉與唐皆用此制遂增至十一室康帝承統以兄弟爲一室故不遷遠廟而祔成帝唐以敬文武三宗同爲一代於太廟東間增置兩室定爲九代十一室今太廟已滿此數如

用不拘常數之說增至十二室可也然廟制已定復議增
展其事甚重又與睿宗皇帝祔室昭穆亦恐更改春秋之
義不以親親害尊尊漢志云父子不並坐而孫可從王父
若武靈升祔太廟贈作十二室依春秋尊尊之典武靈當
在十一室祔祫合食依孫從王父之典當在太宗之下而
居昭位又當稱宗然前升祔睿宗已在第十一室累遇祫
享睿宗在穆位與太宗昭位相對若更改祔室及昭穆序
非有司所敢輕議宜取聖裁十九年四月祔祔閔宗遂增
展太廟爲十二室二十九年世宗將祔廟有司言太廟十
二室自始祖至熙宗雖係八世然世宗與熙宗爲兄弟不

相爲後用晉成帝故事止係七世若特非世宗顯宗卽係九世於是五月遂祧獻祖昭祖陞祔世宗明德皇后顯宗于廟貞祐二年宣宗南遷廟社諸祀並委中都自抹撫盡慮棄城南奔時謁之禮盡廢四年禮官言廟社國之大事今主上駐蹕陪京列聖神主已遷于此宜重修太廟社稷以奉歲時之祭按中都廟制自始祖至章宗凡十二室而今廟室止十一若增建恐難卒成况時方多故禮宜從變今擬權祔肅宗主世祖室始祖以下諸神主于隨室奉安主用栗依唐制皇統九年所定也祔室旁及上下皆石門東向以木爲闔扉以朱室中有褥奠主訖帝主居左覆以

黃羅帕后主居右覆以紅羅帕 黻衾以紙木爲筐兩足如立屏狀覆以紅羅三幅繡金斧五十四裏以紅綃覆於屏上其半無文者垂於其後置北墉下南向前設几筵以坐神主 五席各長五尺五寸闊二尺五寸筵粉純以蘭爲席緣以紅羅以白繡蕙文及雲氣之狀復以紅綃裏之每位二繖席畫純以五色絨織青蒲爲之緣以紅羅畫藻文及雲氣狀亦以紅綃裏之每位二在筵上次席黻純以輕筠爲之亦曰桃枝席緣以紅綃繡鐵色斧裏以紅綃每位二在繖席上虎席二大者長同惟濶增一尺以虎皮爲褥有緼以紅羅繡金色斧緣之又有小虎皮褥制同三

席時曠則用桃枝次席時寒則去桃枝加虎皮褥夏秋享則用桃枝次席二冬則去桃枝加小虎皮褥於繖席上臘冬則又添大虎皮褥二於繖上遷小虎皮褥二在大褥之上曲几三足直几二足各長尺五寸以丹漆之帝主前設曲几后設直几

禘祫大定十一年尚書省奏禘祫之儀曰禮緯三年一祫五年一禘唐開元中太常議禘祫之禮皆爲殷祭祫爲合食祖廟禘謂禘序尊卑申先君逮下之慈成群嗣奉親之孝自異常享有時行之祭不欲數數則黷不欲踈踈則怠是以王者法諸天道以制祀典烝嘗象時禘祫象閏五歲

再閏天道大成宗廟法之再爲穀祭自周以後並用此禮
自大定九年已行祫禮若議禘祭當於祫後十八月孟夏
行禮詔以三年冬祫五年夏禘爲常禮又言海陵時每歲
止以二月十月遣使兩享三年祫享按唐禮四時各以孟
月享于太廟季冬又臘享歲凡五享若依海陵時歲止兩
享非天子之禮耳從典禮歲五享從之享日並出神主前
廊序列昭穆應圖功臣配享廟廷各配所事之廟以位次
爲序以太子爲亞獻親王爲終獻或並用親王或以太尉
爲亞獻光祿卿爲終獻其月則停時享儀闕

朝享儀大定十一年十一月郊祀前一日朝享太廟齋戒

如親郊享前三日太廟令帥其屬掃除廟之内外點檢司
於廟之前約度設兵衛旗幟尚舍於南神門之西設饌幔
十一南向以西爲上殿中監帥尚舍陳設大次殿又設小
次於阼階下稍南西向又設皇帝拜褥位殿上版位稍西
又設黃道褥於廟門之内外自玉輅至升輦之所又自大
次至東神門又設七祀位一於殿下橫街之北西街之西
東向配享功臣位於殿下道東橫街之南西向北上前二
日大樂令設宮縣之樂於庭中四方各設編鐘三編磬三
東方編鐘起北編磬間之東向西方編磬起北編鐘間之
西向南方編磬起西編鐘間之北方編鐘起西編磬間之

俱北向設特磬大鐘鐃鐘共十二於編縣之內各依辰位
樹路鼓路鼗於北縣之內道之左右晉鼓一在其後稍南
植建鼓鞀鼓應鼓於四隅建鼓在中鞀鼓在左應鼓在右
置祝敔於縣內祝一在道東敔一在道西立舞表於鄼綴
之間設登歌之樂於殿上前楹間金鐘一在東玉磬一在
西俱北向祝一在金鐘北稍西敔一在玉磬北稍東搏拊
二一在祝北一在敔北東西相向琴瑟在前其匏竹者立
於階間重行北向諸工人各位於縣後前一日太廟令開
室奉禮郎帥其屬設神位於每室內北墉下各設黼宸一
莞蓆一繅蓆二次席二紫綾厚褥一紫綾蒙褥一曲几一

直几一又設皇帝版位於殿東間門內西向又設飲福位於東序西向又設亞終獻位於殿下橫街之北稍東西向助祭親王宗室使相位在亞終獻之後助祭宗室位在橫街之南西向奉瓚官奉瓚盤官進爵酒官奉爵官等又在其南奉匱槃巾篚官位於其後七祀獻官位在奉爵官之南助奠讀祝奉壘洗爵洗等官位於其後司尊彝官位在七祀獻官之南亞終獻司壘洗爵洗奉爵酒官等又在其南並西向北上大禮使位於西階之西稍南與亞終獻相對太尉司徒助祭宰相位在大禮使之南侍中執政官又在其南禮部尚書太常卿太僕卿光祿卿功臣獻官在西

舉冊光祿丞太常博士又在其西功臣助奠壘洗爵洗等
官位於功臣獻官之後又設監祭御史位二於西階下俱
東向北上奉禮郎太廟令太官令太祝官闡令祝史位於
亞獻終獻奉爵酒官之南薦籩豆簠簋官薦俎齋郎又在
太祝奉禮郎之南太廟丞太官丞各位於令後協律郎位
二一於殿上前楹間一於宮縣之西北俱東向大樂令於
登歌樂縣之北大司樂於宮縣之北良醞令於酌尊所俱
北向又設助祭文武群官位於橫街之南東向北上又設
光祿卿陳牲位於東神門外橫街之東西向以南爲上設
廩犧令位於牲西南北向諸太祝位於牲東各當牲後祝

史各陪其後俱西向設禮部尚書省牲位於牲前稍北又設御史位於禮部尚書之西俱南向禮部帥其屬設祝冊案於室戶外之右司尊彝帥其屬設尊彝之位於室戶之左每位罍彝一黃彝一犧尊二象尊二著尊二山罍二各加勺罍站爲酌尊又設瓚槃爵站於篚置于始祖尊彝所又設壺尊二太尊二山罍四各有站罍在殿下階間北向西上設而不酌七祀功臣每位設壺尊二於座之左皆加罍站於內酌尊加勺皆藉以席奉禮郎設祭器每位四簋在前四簋次之次以六甃次以六鉶籩豆爲後左十有二籩右十有二豆皆濯而陳之藉以席籩豆加以巾蓋於內

籩一豆一簋一簋一并俎四設於每室饌幔內又設御洗
二於東階之東又設亞終獻盥洗於東橫街下東南北向
盥在洗東篚在洗西南肆實以巾又設亞終獻爵洗於盥
洗之西盥在洗東篚在洗西南肆實以巾爵并坩執巾盥
巾篚各位於其後享日丑前五刻太常卿帥執事者設燭
於神位前及戶外光祿卿帥其屬入實籩豆簋之實魚鱸
糗餌粉養乾棗形鹽鹿脯榛實乾榛桃菱芡栗以序爲次
豆之實芹菹笋菹葵菹菁菹韭菹醢食魚醢兔醢豚拍鹿
醢醢醢糝食以序爲次又鉶實以羹加芼滑登實以大羹
簋實以稻梁簋實以黍稷梁在稻前稷在黍前良醢令入

實尊彝辟彝黃彝實以鬱鬯犧尊象尊著尊實以玄酒外

皆實以酒

用香藥酒

各加坩勺罍殿下之尊壺壺尊太尊山壺

內除山壺上尊實以玄酒外皆實以酒加罍坩太廟令帥其屬設七祀功臣席褥於其次每位各設莞席一碧綃褥一又各設版位於其座前又籩豆簋簋各二俎一每位次各設壺尊二於神座之右北向玄酒在西良醢令以法酒實尊如常加勺罍置爵於尊下加坩光祿卿實饌左二籩栗在前鹿脯次之右二豆菁菹在前鹿鸞次之俎實以羊熟簋簋實以黍稷太廟令又設七祀燎柴及開座坎於西神門外之北太府監陳異寶嘉瑞伐國之寶戶部陳諸州

歲貢金爲前列玉帛次之餘爲後皆於宮縣之北東西相
向各藉以席凡祀神之物當時所無者則以時物代之。
省牲器前一日未後廟所禁行人司尊彝奉禮郎及執事
者升自西階以俟少頃諸太祝與廩犧令以牲就位禮直
官贊者引禮部尚書光祿卿丞詣省牲位立定禮直官引
禮部尚書贊引者引御史入就西階升遍視滌濯訖執事
者皆舉冪曰潔俱降就省牲位禮直官稍前曰告潔畢請
省牲次引禮部尚書侍郎稍前省牲訖退復位次引光祿
卿丞出班巡牲一匝光祿丞西向曰充曰備廩犧令帥諸
太祝巡牲一匝西向躬身曰脯禮直官稍前曰省牲畢請

就省饌位引禮部尚書以下各就位立定御史省饌具畢
禮直官贊省饌訖俱遂齋所光祿卿丞及太祝廩犧令以
次牽牲詣厨授太官令禮直官引禮部尚書詣厨省鼎鑊
視濯漑訖還齋所晡後一刻太官令帥宰人執鑾刀割牲
祝史各取毛血每座共實一豆遂烹牲祝史洗肝於鬱鬯
又取肝膋每座共實一豆俱還饌所鑾駕出宮前一日
有司設大駕鹵簿於應天門外尚輦進玉輅於應天門內
南向其日質明侍臣直衛及導駕官於致齋殿前左右分
班立俟通事舍人引侍中俛伏跪奏請中嚴皇帝服通天
冠絳紗袍少頃侍中奏外辦皇帝出齋室卽御座羣官起

居訖尚輦進興侍中奏請皇帝升輿皇帝乘輿侍衛警蹕
如常儀太僕卿先詣玉輅所攝衣而升正立執轡導駕官
前導皇帝至應天門內玉輅所侍中進當輿前奏請皇帝
降輿升輅皇帝升輅太僕卿立授綬導駕官分左右步導
以裏爲上門下侍郎進當輅前奏請車駕進發奏訖俛伏
興退復位侍衛儀物止於應天門內車駕動稱警蹕至應
天門門下侍郎奏請車駕少駐勅侍臣上馬侍中奉旨退
稱曰制可門下侍郎退傳制稱侍臣上馬贊者承傳勅侍
臣上馬導駕官分左右前導門下侍郎奏請車駕進發車
駕動稱警蹕不鳴鼓吹將至太廟禮直官贊者各引享官

通事舍人分引從享羣官宗室子孫於廟門外立班奉迎
駕至廟門廻輅南向侍中於輅前奏稱侍中臣某言請皇
帝降輅步入廟門皇帝降輅導駕官前導皇帝步入廟門
稍東侍中奏請皇帝升輿尚輦奉輿侍衛如常儀皇帝乘
輿至大次侍中奏請皇帝降輿入就大次皇帝入就次簾
降繖扇侍衛如常儀太常卿太常博士各分立於大次左
右導駕官詣廟庭班位立俟。晨裸享日丑前五刻諸享
官及助祭官各服其服太廟令良醢令帥其屬入實尊壘
光祿卿太官令進饌者實邊豆簠簋並徹去蓋罍奉禮郎
贊者先入就位贊者引御史太廟令太祝官闌令祝史與

執事官等各自東偏門入就位未明二刻禮直官引太常寺官屬并太祝宮闈令升殿開始祖拓室太祝宮闈令捧出帝后神主設於座以次逐室神主各設於內黼黻前置定贊者引御史太廟令宮闈令太祝祝史與太常官屬於當階間重行北向立奉禮郎於殿上贊奉神主訖奉禮曰再拜贊者承傳御史以下皆再拜訖各就位大樂令帥工人二舞入就位禮直官贊者各引享官通事舍人分引助祭文武羣官宗室入就位符寶郎奉寶陳於宮縣之北皇帝入大次少頃侍中奏請中嚴皇帝服袞冕侍中奏外辦太常卿俛伏跪奏稱太常卿臣某言請皇帝行事俛伏興

簾捲皇帝出次太常卿太常博士前導繖扇侍衛如常儀
大禮使後從至東神門外殿中監跪進鎮圭太常卿奏請
執圭皇帝執鎮圭繖扇仗衛停於門外近侍者從入協律
郎跪伏舉麾興鼙鼓祝官縣昌寧之樂作至阼階下偃麾
憂敵樂止升自阼階登歌樂作左右侍從量人數升至版
位西向立樂止前導官分左右侍立太常卿前奏請再拜
皇帝再拜奉禮曰衆官再拜贊者承傳凡在位者皆再拜
奉禮又贊諸執事者各就位禮直官贊者分引執事者各
就殿上下之位太常卿奏請皇帝詣壘洗位登歌樂作至
阼階樂止降自阼階宮縣樂作至洗位樂止內侍跪取匱

興沃水又內侍跪取盤興承水太常卿奏請搢鎮圭皇帝
搢鎮圭盥手訖內侍跪取巾於篚興以進悅手訖奉瓚盤
官以瓚跪進皇帝受瓚內侍奉匱沃水又內侍跪奉槃承
水洗瓚訖內侍跪奉巾以進皇帝拭瓚訖內侍奠槃匱又
奠巾於篚奉瓚槃官以槃受瓚太常卿奏請執鎮圭前導
皇帝升殿官縣樂作至阼階下樂止皇帝升自阼階登歌
樂作太常卿前導詣始祖位酌尊所樂止奉瓚槃官以瓚
涖鬯執尊者舉冪侍中跪酌鬱鬯訖太常卿前導入詣始
祖室神位前北向立太常卿奏請搢鎮圭跪奉瓚槃官西
向跪以瓚授奉瓚官西向以瓚跪進太常卿奏請執瓚以

卷三
三
鬯裸地皇帝執瓚以鬯裸地訖以瓚授奉瓚槃官太常卿
奏請執鎮圭俛伏興前導出戶外太常卿奏請再拜皇帝
再拜太常卿前導詣次位並如上儀裸畢太常卿奏請還
版位登歌樂作至版位西向立樂止太常卿奏請還小次
前導皇帝行登歌樂作降自阼階登歌樂止宮縣樂作將
至小次太常卿奏請釋鎮圭殿中監跪受鎮圭皇帝入小
次簾降樂止少頃宮縣奏來寧之曲以黃鍾爲宮大呂爲
角大簇爲徵應鍾爲羽作仁豐道洽之舞九成止黃鍾三
奏大呂太簇應鍾各再奏送神通用來寧之曲初晨裸將
畢祝史各奉毛血及肝膋之豆先於南神門外齋郎奉爐

炭蕭蒿黍稷各立於肝膋之後皇帝既晨裸畢至樂作六成皆入自正門升自太階諸太祝於階上各迎毛血肝膋進奠於神座前祝史立於尊所齋郎奉爐置於室戶外之左其蕭蒿黍稷各置於爐炭下齋郎降自西階諸太祝各取肝燔於爐還尊所○進熟皇帝升裸太官令帥進饌者奉陳於南神門外諸饌慢內以西爲上禮直官引司徒出詣饌所與薦俎齋郎奉俎并薦籩豆簠簋官奉遵豆簠簋禮直官太官令引以序入自正門宮縣豐寧之樂作徹豆通用至太階樂止祝史俱進徹毛血之豆降自西階以出饌升諸太祝迎於階上各設於神位前先薦牛次薦羊次薦豕

及魚禮直官引司徒以下降自西階復位諸太祝各取蕭蒿黍稷擣於脂燎於爐炭訖還尊所贊者引舉冊官升自西階詣始祖位之右進取祝冊置在版位之西置訖於祝冊案近南立太常卿跪奏請詣壘洗位簾捲出次宮縣樂作殿中監跪進鎮圭太常卿奏請執鎮圭前導詣壘洗位樂止盥手洗爵並如晨裸之儀盥洗訖太常卿奏請執鎮圭前導升殿宮縣樂作至阼階下樂止升自阼階登歌樂作太常卿前導詣始祖位尊彝所登歌樂作至尊彝所登歌樂止宮縣奏大元之樂文舞進奉爵官以爵涖尊執尊者舉冪侍中跪酌犧尊之泛齊訖太常卿前導入詣始祖

室神位前北向立太常卿奏請搢鎮圭跪奉爵官以爵授
進爵酒官進爵酒官西向以爵跪進太常卿奏請執爵三
祭酒三祭酒於茅苴訖以爵授進爵官進爵酒官以爵授
奉爵官太常卿奏請執鎮圭與前導出戶外太常卿奏請
少立樂止舉冊官進舉祝冊中書侍郎搢笏跪讀祝舉祝
官舉冊奠訖先詣次位太常卿奏請再拜再拜訖太常卿
前導詣次位行禮並如上儀酌獻畢太常卿前導還版位
登歌樂作至位西向立定樂止太常卿奏請還小次登歌
樂作降自阼階登歌樂止宮縣樂作將至小次太常卿奏
請釋鎮圭殿中監跪受鎮圭入小次簾降樂止文舞退武

舞進宮縣奏肅寧之樂作功成治定之舞舞者立定樂止
○皇帝酌獻訖將詣小次禮直官引博士博士引亞獻詣
盥洗位北向立搯圭盥手悅手執圭詣爵洗位北向立搯
圭洗爵拭爵以授執事者執圭升自西階詣始祖位尊彝
所西向立宮縣樂作執事者以爵授亞獻亞獻搯圭執爵
執尊者舉冪太官令酌象尊之醴齊訖詣始祖神位前搯
圭跪執事者以爵授亞獻亞獻執爵祭酒三祭酒於茅苴
奠爵執圭俛伏興少退再拜訖博士前導亞獻詣次位行
禮並如上儀禮畢樂止終獻除本服執笏外餘如亞獻之
儀七祀功臣獻官行禮畢太常卿跪奏詣飲福位簾捲出

次宮縣樂作殿中監跪進鎮圭太常卿奏請皇帝執鎮圭
前導至阼階下樂止升自阼階登歌樂作將至飲福位樂
止初皇帝既獻訖太祝分神位前三牲肉各取前脚第二
骨加於俎又以籩取黍稷飴共置一邊又酌上尊福酒合
置一尊又禮直官引司徒升自西階東行立於阼階上前
楹間北向皇帝既至飲福位西向立登歌福寧之樂作太
祝酌福酒於爵以奉侍中侍中受爵捧以立太常卿奏請
皇帝再拜訖奏請搢圭跪侍中以爵北向跪以進太常卿
奏請執爵三祭酒於沙池又奏請啐酒皇帝啐酒訖以爵
授侍中太常卿奏請受胙太祝以黍稷飴籩授司徒司徒

跪奉進皇帝受以授左右太祝又以胙肉俎跪授司徒司徒受俎訖跪進皇帝受以授左右禮直官引司徒退立侍中再以爵酒跪進太常卿奏請皇帝受爵飲福飲福訖侍中受虛爵以興以授太祝太常卿奏請執圭俛伏興又奏請皇帝再拜再拜訖樂止太常卿前導皇帝還版位登歌樂作俟至位樂止太祝各進徹籩豆登歌豐寧之樂作卒徹樂止奉禮曰賜胙行事助祭官再拜贊者承傳在位官皆再拜官縣來寧之樂作一成止太常卿奏禮畢前導降自阼階登歌樂止官縣樂作出門官縣樂止織扇仗衛如常儀太常卿奏請釋鎮圭殿中監跪受鎮圭皇帝還大次

通事舍人禮直官贊者各引享官宗室子孫及從享群官
以次出及引導駕官東神門外大次前祇候前導如來儀
贊者引御史已下俱復執事位立定奉禮曰再拜皆再拜
贊者引工人舞人以次出大禮使帥諸禮官太廟令太祝
官闌令升納神主如常儀禮畢禮直官引大禮使已下降
自西階至橫街再拜而退其祝冊藏於匱七祀功臣分奠
如祫享之儀

時享有司行事前期太常寺舉申禮部關學士院司天臺
擇日以其日報太常寺前七日受誓戒於尚書省其日質
明禮直官設位版於都堂之下依已定誓戒圖禮直官引

三獻官并應行事執事官等各就位立定贊揖在位官皆對揖訖禮直官以誓文奉初獻官初獻官搢笏讀誓文某月某日孟春薦享太廟各揚其職不恭其事國有常刑讀訖執笏七品以下官先退餘官對拜訖乃退散齋四日治事如故宿於正寢唯不弔喪問疾作樂判署刑殺文字決罰罪人及預穢惡致齋三日於本司唯享事得行其餘悉禁一日於享所已齋而闕者通攝行事前三日兵部量設兵衛列於廟之四門前一日禁斷行人儀鸞司設饌幔十一所於南神門外西南向又設七祀司命尸二位於橫街之北道西東向又設群官齋宿次於廟門之東西舍前二

日大樂局設登歌之樂於殿上太廟令帥其屬掃除廟殿門之内外於室內鋪設神位於北墉下當戶南向設几於筵上又設三獻官拜褥位二一在室內一在室外學士院定撰祝文訖計會通進司請御署降付禮部置於祝案祠祭局濯漑祭器與尊彝訖鋪設如儀內太尊二山罍二在室犧尊五象尊五鷄彝一鳥彝一在室戶外之左爐炭稍前著尊二犧尊二在殿上象尊二壺尊六在下俱北向西上加罍皆設而不酌并設獻官盥洗位禮部設祝按於室戶外之右禮直官設位版并省牲位如式前一日諸太祝與廩犧令以牲就東神門外司尊彝與禮直官及執事皆入升自西

禮直官引太常卿贊者引御史自西階升通親滌
濯執尊者舉鼎告絜訖引降就省牲位廩犧令少前曰請
省牲退復位太常卿省牲廩犧令及太祝巡牲告備皆如
郊社儀既畢太祝與廩犧令以次牽牲詣厨授太官令贊
者引光祿卿詣厨請省鼎鑊申視滌漑贊者引御史詣厨
省饌具訖與太常卿等各還齋所太官令帥宰人以鸞刀
割牲祝史各取毛血每室共實一豆又取肝膋共實一豆
置饌所遂烹牲光祿卿帥其屬入實祭器良醢令入實尊
彝享日質明百官各服其品服禮直官贊者先引御史博
士太廟令太官令諸太祝祝史司尊彝與執壘篚官等入

自南門當階間北面西上立定奉禮曰再拜贊者承傳皆

再拜訖贊者引太祝與宮闈令升自西階詣始祖室開柶

室太祝捧出帝主宮闈令捧出后主置於座

帝主在西贊后主在東贊

者引太祝與宮闈令降自西階俱復位奉禮曰再拜贊者

承傳在位官皆再拜訖俱各就執事位大樂令帥工人入

禮直官贊者分引三獻官與百官俱自南東偏門入至廟

庭橫街上三獻官當中北向西上應行事執事官并百官

依品重行立奉禮曰拜贊者承傳應北向在位官皆再拜

其先拜者不拜拜訖贊者引三獻官詣廟殿東階下西向位其餘

行事執事官與百官俱各就位訖禮官詣初獻官前稱請

行事協律郎跪俛伏興樂作禮直官引初獻詣盥洗牀北
向立定樂止搢笏盥手悅手執笏詣爵洗位北向立搢笏
洗瓚拭瓚以瓚受執事者執笏升殿樂作至始祖室尊彝
所西向立樂止執事者以瓚奉初獻官獻官搢笏執瓚執
尊者舉簋太官令酌鬱鬯訖初獻以瓚授執事者執笏詣
始祖室神位前樂作北向立搢笏跪執事者以瓚授初獻
官初獻官執瓚以鬯裸地訖以瓚授執事者執笏俛伏興
出戶外北向再拜訖樂止每室行禮並如上儀禮直官引
初獻降復位初獻將升裸祝史各奉毛血肝腎豆及齋郎
奉爐炭蕭蒿黍稷篚各於饌幔內以俟初獻晨裸訖以次

入自正門升自太階諸太祝皆迎毛血肝膋豆於階上俱
入奠於神座前齋郎所奉爐炭蕭蒿篚皆置於室戶外之
左與祝史俱降自西階以出諸太祝取肝膋洗於鬱鬯燔
於爐炭訖還尊所享日有司設羊鼎十一豕鼎十一於神
厨各在鑊右初獻既升裸光祿卿帥齋郎詣厨以匕升羊
於鑊實于一鼎肩膊肫肱正脊一橫脊一長脅一短脅
一代脅一皆二骨以並次升豕如羊實于一鼎每室羊豕
各一鼎皆設局幕齋郎對舉入鑊放饌幔前齋郎抽局委
于鼎右除幕光祿卿帥太官令以匕升羊載于一俎有臂
肫在上端肫脰在下端脊脅在中次升豕如羊各載于一

俎每室羊豕各一俎齋郎卽以扃舉鼎先退置于神厨訖
復還饌幔所禮直官引司徒出詣饌幔前立以俟光祿卿
帥其屬實籩以粉養實豆以糝食實簠以梁實簋以稷俟
初獻裸畢復位祝史俱進徹毛血之豆降自西階以出禮
直官引司徒帥薦籩豆簠簋官奉俎齋郎各奉籩豆簠簋
羊豕俎每室以序而進立於南神門之外以俟羊俎在前
豕俎次之籩豆簠簋又次之入自正門樂作升自太階諸
太祝迎引於階上樂止各設於神位前訖禮直官引司徒
以下降自西階樂作復位樂止諸太祝各取蕭蒿黍稷播
於脂燔於爐炭還尊所禮直官引初獻詣盥洗位樂作至

位北向立樂止搢笏盥手悅手執笏詣爵洗位北向立搢
笏洗爵拭爵以爵授執事者執笏升殿樂作詣始祖室酌
尊所西向立樂止執事者以爵授初獻初獻搢笏執爵執
事者舉冪太官令酌饌尊之泛齊訖次詣第二室酌尊所
如上儀詣始祖神位前樂作北向立搢笏跪執事者以爵
授初獻初獻執爵三祭酒於茅苴奠爵執笏俛伏興出室
戶外北向立樂止贊者引太祝詣室戶外東向搢笏跪讀
祝祝文讀訖執笏興次詣第二室次詣每室行禮並如上
儀初獻降階樂作復位樂止禮直官次引亞獻詣盥洗位
北向立搢笏盥手悅手執笏詣爵洗位北向立搢笏洗爵

拭爵以授執事官執笏升殿詣始祖酌尊所西向立執事者以爵授亞獻亞獻搢笏執爵執尊者舉冪太官令酌象尊之醴齊訖次詣第二室酌尊所如上儀詣始祖神位前樂作北向立搢笏跪執事者以爵授亞獻亞獻執爵三祭酒于茅苴奠爵執笏俛伏興出戶外北向再拜訖樂止次詣每室行禮並如上儀降階樂作復位樂止禮直官次引終獻詣盥洗及升殿行禮並如亞獻之儀降復位次引太祝徹籩豆少移樂作卒徹樂止俱復位禮直官曰賜胙贊者承傳曰賜胙再拜在位者皆再拜禮直官引太祝宮闈令奉神主太祝搢笏納帝主於匱奉入柝室執笏退復位

次引宮衛令納后主於匱奉入柝室並如上儀退復位禮
直官贊者引行事執事官各就位奉禮曰再拜贊者承傳
應在位官皆再拜禮直官贊者引百官次出大樂令帥工
人次出太官令帥其屬徹禮饌次引監祭御史詣殿監視
卒徹訖還齋所太廟令闔戶以降太常藏祝版於匱光祿
以胙奉進監祭御史就位展視光祿卿望闕再拜乃退其
七祀夏竈中霤秋門厲冬行鋪設祭器入實酒饌俟終獻
將升獻獻官行禮并讀祝文并每歲四孟月臘五享並如
上儀

志第十一